

无上祕要卷之四十三同卷

十七

修道冠服品

三皇道士法服

洞神三皇經

受道之身改易世衣者身之章號為法服人

或有衣玄青及白三色為科存甲子甲寅甲

申之炁固身形也玄冠烏巾青縹單衣白芒

草屣謂為法服得道昇天文衣自至

凡兼參三洞通服裙褐履板冠巾共得用取

靈寶道士法服

洞玄真一自然經訣

太極真人言受道執經法衣巾褐褐皆長三

尺六寸三十二條若鹿皮巾褐至佳皮褐无

條數也黃裳對之足下草履皮履彊可著耳

洞玄太極隱注經

注曰轉經坐小牀上高五尺廣長悉等巾鹿

皮巾披鹿皮帔不須著褐也无皮用布帔著

草履

太極真人讀經法服披離羅九光錦帔丹羅

寶曜之中足下獅子文履令道士讀經勤苦

於法事鹿皮帔服後得道日天帝授子離羅九光之帔天寶纓絡飛仙法服以酬佳德

洞玄請問經下

夫學道常淨潔衣服別靜燒香安高座盛經禮拜精思存真吐納導養悔謝七世父母及

今世前世重非惡緣布施立功長齋幽靜定

其本願當令心虛意玄然後其道可成也善

備巾褐單裙讀經帔衣法制則不得妄借人

著不淨處名曰法服恒有三神童侍之

昔有一賢者迎待道士道士不得往即以帔

褐付之行至家其人敬信燒香禮之如見道

士神童見形云道士使我來也主人于時不

知是神童主人病者即除愈家門无恙神童

語主人病者已愈道士无煩復來賢者可送

法服還道士也主人如其語送至道士主人

問曰一日病苦奉請先生齋先生多事但遣

信竟不見願齋病人今已愈奉送法服道士

愕然駭聽言畢答曰貧道一日須法事竟往

賢者更不來貧道是以不去非為負信亦無

人可遣又不知君家室病愈此乃當由主人

心盡所致問往人形貌何似主人答言年可十五六姿容端正佳麗出人道士思惟我弟

子都無此人恐神人降耳故法服當必令淨

潔制作得法不爾鬼反害人若敗壞當自衣

之不得他用也

昇玄經

有一仙人寶子明著黃褐戴玄巾即前作禮

行讚繞太上七巾

上清道士法服品

洞真四極明科

凡修上清道經大洞真經三十九章入室之

日當身冠法服作鹿皮之巾葛巾亦可當披

鹿皮之帔無有紫青可用當以紫為衣青為

裏帔今廣四尺九寸以應四時之數長五尺

五寸以法天地之炁表裏一法表當今二十

四縫裏今一十五條內外三十九條以應三

十九帝真之位身備帝皇之帝便應冠帶帝

皇之服故也無有此服不得妄動寶經詠一

句則擊徹九天九真侍位所應不輕單衣誦

經天魔侵景萬精亂者神喪炁散死入幽泉

又不得仙有此服者給玉童玉女各二人典衛侍真不得妄借異人輕慢神服五犯身無復仙冀十犯被拷左官

凡女子學上清白日昇天之法受靈寶玉訣騰行大洞皆充元君夫人之位入室之日當

冠元君之服用紫紗作裙令用二丈四尺身袖長促就令取足當使兩袖作十六條身二十二條又作青紗之裙令用四十五尺作八幅幅長四尺九寸餘作襪腰分八幅作三十二條此作飛青之裙元君之服也身冠此服

萬靈束帶千魔滅形給玉童玉女各十二人典掌法服也無此服不得誅於上清寶經輕以常服誦詠上經天魔侵景萬精亂音神散悉離又不得仙

讀經軌度品

真迹經

列紀曰侍文玉童玉女並司察有書之道士言功糾罪上聞上清玄中先師大過被拷於三官小過奪紀以促年大罪禍及於三組小罪止身以受殃輕慢則神去汗穢則文藏學

仙者開視靈文皆當起拜燒香天靈司察可不慎敬諸非傳授皆不得妄說篇目說則犯泄漏天文之科

洞真黃素四四方經

凡道士修受上法欲有所誦讀經文發快之時皆當燒香心拜經前叩齒五通乃微呪曰玉帝上法上聞三清吉日齋戒敢開神經萬試隱伏所向皆成玉童侍護玉華散磬上告三元與我長生呪畢開經然後乃得誦讀之此名為大帝開經之法令玉童玉女侍守燒香啓降神靈上聞九天

洞真四極明科

學士入室誦經皆五帝束帶四司浮位不得臨經住音與外人交言失略言句稽誕天真想念不專三犯伐功斷事不得成仙十犯身

被左官拷

入室誦經當令言句相屬不得越略天音失一句更却百言而讀失二句却還二百言失五句却還五百言始就誦失一句便誦一篇而補之十犯至三十犯廢功斷事不得成仙

五十犯至百犯延七祖已身並被左右官考罰刀山食火二十四獄三塗之役

入室誦經當令目注經文心念神真不得臨經他念異想以亂天音十犯至三十犯伐功斷事不得成仙

入室誦經千言以下不得臨經進飲千言以上至五千言得一進飲五千以上至萬言得二進飲萬言以上得三進飲不得妄進飲食以充炁音五犯至十犯伐功斷事不得成仙入室誦經萬言疲極得聽中住消息後得讀句竟徧雖爾不得經宿殘句虧廢天度五犯至十犯伐功斷事不得成仙

入室誦經若有男女同學亦得同室但男女異牀北向誦經當令男在東女在西不得座起卧息混同一席三犯斷功廢事不得成仙

五犯身被左官所拷

讀大洞真經三十九章迴風混合帝一百神寶名玉檢堆一五老寶經洞玄素靈大有妙經大丹隱書上品高真之文北向心拜四方叩齒三十六通咽液三十六過存五藏之內

生有五色之光氣注五星之精然後先讀神州七轉之道次讀百神內名乃得誦大洞真經誦經當令心目相應不得雜念異想錯亂真神當使徧句畢子不得中住越略言句左官所執三犯不得成仙

讀上清寶經三十卷獨立之訣存思修行皆北向心拜四方叩齒二十四道咽液二十四過存五星日月三精玄注於兆身然後誦經行事當令心口相應无有異念披卷悉令言句周竟不得中止疑聽越略三犯乃不得仙
五犯七祖父母己身並為左右官所執
凡誦靈寶經或洞玄或昇玄之經皆東向叩齒十二通咽液十二過再拜存紫雲之炁覆冠兆身然後誦經當令心目相應目无他視心无異念披卷言句周竟不得中住越略天音三犯萬不得仙五犯以上考屬左官
凡讀天皇地皇人皇太字修行其道皆向南再拜叩齒十二通咽氣十二過存天皇君身長九寸披青帔著青錦縵頭戴九光寶冠手執飛仙玉策在左人皇君身長九寸披黃帔

著黃錦縵頭戴七色寶冠手執上皇保命玉策在右地皇君身長九寸披白錦帔著素錦之縵頭戴三晨玉冠手執元皇定錄之策在後三皇真君在兆左右然後披卷行事修此道不得交接陰陽履踐入穢輕慢天文觸犯真靈身被左右官之考

誦經品

洞玄空洞靈寶經

善信男女香燈供養見世光明身入无為受福自然若能長齋誦經靈寶萬徧道成身生水火立致飛行其道高妙不得漏泄
洞玄玉京山經

兆若能長齋久思誦誦道德洞經而叩齒咽液吐納太和身作金色項負圓光頭簪日華手把月英玄景靈符十絕之幡斯德巍巍道之至尊无窮玄化太上之真人矣將感太无動天老致飛龍降天仙也
洞玄九天神章
九天生神章乃三洞飛玄之炁合成至音結成靈文混合百神隱顯內名生死結形自然

之章天寶誦之以開天地之光靈寶誦之以開九幽長夜之鬼神寶誦之以制萬靈太一誦之以具身神帝君誦之以結形九天誦之以生人學士誦之以昇天鬼神聞之以昇遷凡夫聞之以長存幽鬼聞之以開度枯朽聞之以發煙爨夜聞之以能言死骸聞之以還

人三寶神與萬品生根故非鬼神所知凡夫所聞三元宮中宿有金名紫字刻書來生應為三清神仙之人當得此文誦之一過聲聞九天誦之二過天地設恭誦之三過三界禮房誦之四過天王降仙誦之五過五帝朝真誦之六過魔王束身誦之七過星宿停關誦之八過幽夜光明誦之九過諸天下臨一切神靈莫不衛軒一過徹天胞源宣通二過響地胎結解根三過神禮寃門鍊仙四過天王降鑿幽夜開關五過五帝朝真藏府清涼六過魔王伏諾胃營生津七過星宿朗明孔竅開關八過幽夜顯光三部八景整具形神九過諸天下臨三關五藏六府九宮金樓玉室十二重門紫戶玉閣三萬六千關即根源本

始一時生神九過為一編一編周竟三界舉
名五帝文別稱為真人十編通蒸制御萬靈
魔王保舉列上諸天百編通神坐致自然太
一度符元君受生千編通靈坐在立亡仙童
玉女役使東西萬編道備馳騁龍駕白日登
晨

洞玄五稱經

太上玄一真人曰道德五千文經之至微宣
道之意正真之教煥乎奇文誦之千日虛心
注玄白日昇仙上為西華真人此高仙之宗
也亦能致慶於七祖

洞玄无量度人經

道言上學之士修誦是經皆即受度飛昇南
宮世人受誦則延壽長年後皆得作尸解之
道鬼神暫滅不經地獄即得返形遊行太空
此經微妙普度无窮一切天人莫不受慶无
量之福生死蒙惠
本命之日誦詠是經鬼神證正萬惡長存不
經苦惱身有光明三界侍衛五帝司迎萬神
朝禮名書上天

道言夫末學道淺或仙品未充運應滅度身
經太陰臨過之時同學至人為其行香誦經
十編以度尸形如法鬼神還上南宮隨其學
功計日而得更生轉輪不滅便得神仙
道言夫天地運終亦當修齋行香誦經星宿

錯度日月失昏亦當修齋行香誦經四時失

度陰陽不調亦當修齋行香誦經國主有災

兵革四興亦當修齋行香誦經疫毒流行兆

民死傷亦當修齋行香誦經師友命過亦當

修齋行香誦經夫齋戒誦經功德甚重上消

天災保鎮帝王下禳毒害以度兆民生死受

賴其福難勝故曰无量普度天人

道言凡有是經能為天地帝主兆民行是功

德有災之日發心修齋燒香誦經十過皆諸

天記名萬神侍衛

道言此諸天中大梵隱語无量之音舊文字

皆廣長一丈天真皇人昔書其文以為正音

有知其音能齋而誦之者諸天皆遣飛天神

王下觀其身書其功勤上奏諸天萬神朝禮

地祇侍門大勳魔王保舉上仙道備剋得遊

行三界昇入金門

洞真金房度命經

此經高上之玉章大洞之靈篇羅列一形之
內誦之一編妙理自解誦之十編反容童顏
誦之百篇內化胎仙誦之千編坐在立亡萬
編道備白日登晨長齋寂處不聞風塵道无
弗降計日昇仙

誦經十過為一編

誦經十過為一編編則服金房保命符各一
枚十編便十服符限編此則通神致真坐見
八方餘理百關節度納靈萬惡總歸則能長
生壽極天地三光同年

洞真龍景紫鳳赤書經

亦書九十一言是西城真人所受別抄獲曼
旨所修求仙之本乃鳳氣之隱音得佩之者
神仙行之成真凡人奉之者獲惠若能長齋
苦行栖身幽阜誦詠萬編則策龍駕虛上登
玉清隱在人間佩文誦音神官來朝誦詠一
編神朗氣清千妖束身萬魔滅形
洞真素靈大有妙經
太極真人曰太上素靈洞玄妙經與元始同

生靈文既存衆真詣座燒香禮經遊行誦此
二十一篇之章以慶於神庭也玉音激朗清
徹九天其句幽微妙趣傍通誦誦一過萬神
啓靈恒當究習與帝合真解宿對之重責我
七玄於幽宮釋五苦於愁慮度身上於三天
妙乎微哉斯之靈文也

洞真三天正法經

三天頌文凡受此文誦之於別室千徧通神
萬徧通真道神則與神交言逆知吉凶通真
則與元始觀顏入水不沉入火不燃經災履
厄騰景三清

洞真太霄琅書瓊文帝章經

凡修衆經以瓊文為先誦誦寂室靜慶霞軒
群魔伏使萬試敢前隨意所修乃得道真萬
徧道徧騰身太清

洞真智慧觀身大戒經

太微天帝君曰道學不表觀身大戒而誦經
萬徧隱處山林昇仙之舉恐未可希耶

洞真外國放品經

當燒香靜室禮願修行誦之一徧萬真交會

五老降形天魔仰伏招仙致真

洞真三元玉檢布經

玉清上官瓊瑤蕭條之唱乃九十章三元君
主之元君恒誦其曲以和於形真之氣慶於
九府之真行三元道當誦其唱求感至靈
招於玄虛降之津路

洞真素奏丹靈六甲符經

上清瓊宮玉女皆以金簡刻書上宮歌章各
聲合唱逸朗玉清上慶神真解滯常陽有得
此文六甲降形能常清齋誦靈音刻華白
鸞上昇瓊宮學失此道徒損形神天真不降
無由成仙

凡修六甲之道每以甲日入室服符誦誦六
宮歌章六年通感玉女降房與兆面言運龍
飛霄上昇兆身秘則靈降泄則受殃

洞真玉清隱書經

大洞玉清隱咒九天上文出自高上口訣解
滯散源大洞真經三十九章理極於此上則
引致高靈之霞映下則滅於萬魔之凶殃誦
之一徧開明幽關三十九戶納受玉津死氣

沉塞百神內歡百神既暢則聲達九玄氣朗
紫霄響叩玉晨五帝束帶萬靈朝軒生來
歸七祖昇遶身致羽翼駕景集雲飛行玉清
位參紫宸此高玄之妙道玉清之秘篇
无上祕要卷之四十三

子七

十二